



Author: M. K. Raina

पछ

स्वनु बटनि पेयि दूरि प्यठु नज़र। सु मोज़ूर ओस कस
ताम सवारि हुंद बिस्तर तु ट्रंक गाडि हुंदिस पशस प्यठ
खारान। दूरि प्यठु योदुवय साफ ओस नु बोज़नु यिवान,
मगर मोज़ूर सुंज़ छाय आँस पूर पूर जान साँबस हिशी।
स्वनु बटनि तुल तेज़ तेज़ कदम। बुथि आसु गाडि यिवान तु
गछान। लूख ति आँस्य नु कम केंह। अकि तरफु ओस
गाड्यन हुंद शोर तु बेयि तरफु कंडक्टरन हुंज़ु क्रकु।
सारिनुय आँस ज़न चल लार। लूकव तु गाड्यव मँज़्य मँज़्य
वथ कडान कडान यीतिस कालस स्वनु बटन्य तथ गाडि
ब्रोंठ कुन वाँच, मोज़ूर ओस द्रामुत। तमि दिच ओरु योर

नज़र, मगर मोज़ूर सुंद नामु निशान ओस नु कुनि। स्वनु बटनि प्रुछ बेयिस अँकिस मोज़ूरस तस बापथ मगर केंह लोगुस नु पताह। तति ओसुय नु जान साँबुनि नावुक कांह मोज़ूर। स्वनु बटन्य बीठ अँकिस वानु पेंजि प्यठ तु ओश गोस जॉरी। "म्यानि अँछ ख्यन नु दोखु। सु ओस जान साँबुय", यी सोंचान सोंचान गँयि स्वनु बटन्य ग्वतन।



दँह वॅरी प्रॉन्य कथ आँस। जान साँब ओस वँहरि वुहि। असली ओस सु कमि ताम गामुक रोज़न वोल् मगर पँज़ शेछ आँस नु काँसि पताह। जान साँब ओस हमेशु नीलि रंगुक फ्यरन लागान। येज़ार ओसुस ग्वडव ह्योर आसान तु ख्वरव ओस आसान ननु वोरुय। मस ओसुस ज़्यूठ शानन तान्य। जान साँबस आँस्य अथ गामस मंज़ यिवान व्वन्य शे र्यथ गॉमुत्य। ज़्यादु तर ओस सु महद साँबुनि गरि रोज़ान

तिक्व्याज़ि अख ओसुस तति सख यज़थ वातान तु बेयि
ओसुस तति श्रान करुनस वुशुन पोन्व मेलान।

दपान जान साँबुनि माजि ओस सु मँग्य मँग्य ज़ामुत।
वारियाहस कालस यैलि नु तस बचय ज़ाव, स्व गँयि कथ
ताम ज़ियारतस प्यठ तु गंडुन तति दँश। अमि पतय ओस
जान साँब ज़ामुत। जान साँबस ओस नु परुनस लेखुनस
सुत्य दिल लगान तु दपान ल्वकुचारु प्यठय आँस तस मँत्य
गिलन। आँठु वुहुर्य पानु प्यठय ओस सु गरि नेरान तु गामु
गामु फेरान। जान साँब ओस नु पानस मुतलिक कांह कथ
करान मगर यिमु कथु कति आयि तु कँम्य वनि, ति आँस नु
काँसि पताह। गामु वाँल्य आँस्य अँथ्य मंज़ ख्वश ज़ि सु
ओस तिहुंद गरु यिवान तु तिहिद्य दँद्य आँस्य वारियाहस
हदस ताम कम गछान। वारु वारु बनेयि जान साँबस स्यठाह
मुरीद।

जान साँब ओस नु ज़्यादु कथु करान। आम तोर ओस सु कलु सुती जवाब दिवान। बटु गरि ओसुस गाडु ख्यनुक सख शोख। अमी बहानु आँसिस बटु पनुन गरु साल कॅरिथ निवान तु पनुन्य तकलीफ बावान।

स्वनु बटन्य आँस स्यठाह घमागु दार। गॉम्य गामस ओस अँम्यसुंद नाव मँहशूर। गामुचि ज़नानु आसु अक्सर अँमिस निश यिवान तु मशवरु ह्यवान। गामुक्य मर्द ति आँसिस बडु यज़थ करान। येलि अमि ज़नानन निशि जान साँबुन्य करामात बूज़्य, स्व गॉयि परेशान। "अज़कलु किस दुनियुहस मंज़ छा यिमन कथन कांह सूद। यिमन कथन प्यठ पछ़ करुन्य गॉयि फरसूदु खयॉली। मकार लूख छि सैघन सादन इनसानन अपुज़्य करामात हॉविथ फँसुरावान तु पनुन मतलब कडान। मोन ज़ि कुनि सातु छि कांह

करामात पँज नेरान, स्व छे बगवानु सुंजि मरज़ी सुत्य
सपदान, न कि काँसि मकारु सुंदि वननु सुत्य।"

गामुक्यन ओस अथ मामुलस मंज स्वनु बटनि सुत्य
सख यख्तिलाफ। तिमन निश ओस जान साँब थदि पायुक
फँकीर, युस विज़ि विज़ि ननि करामाँच ओस करान। स्वनु
बटनि ओस नु जान साँब पानु वुछमुत केंह, मगर वुछनुच
ज़रूरथ ति क्या आँस? तस ओस अकि लटि युथुय अख
साँद मकार समख्योमुत, येम्य तस यि दँप्यजि ति फान
ओस थोवमुत कँरिथ। स्वनु बटनि आँस अज़ ति स्व विज़
पूर पाँठ्य याद

अमि द्वह आँस स्वनु बटन्य गर काँम कँरिथ सुली
म्वकुलेमुच। तसुंद खावंद अर्जन दीव ओस साहुबस सुत्य
दोरस प्यठ गोमुत तु बिलूजी ओसुन चकराह करनु बापथ
पानस सुत्य न्यूमुत। स्वनु बटनि ओस अज़ वारियाहि

कॉल्य माल्युन गछुन। केंह काल ओस गोमुत तसंजि माजि
सख ब्यमार तु तमि आसनस काँचाह शेछि सोजुमचु जि
बुथाह वुछहॉय, जिंदुगी प्यठ क्या बरूसु छु?

ताजु कुंघ कोरमुत फ्यरन लॉगिथ कोड स्वनु बटनि
संदूकु मंजु सु देह र्वपयुन युस तमि पछ ब्रोंठ रुनिस मिनतु
कैरिथ ह्योतमुत ओस। देह र्वपयुन थोवुन फ्यरन चंदस तु
गंडुन लूंग्य। "टांगु किराय तु गाडि किराय गॉयि चोर र्वपयि
तु बेयि निमु बाँय सुंघन शुर्यन क्युत केंछा ख्यनु खॉतरु।"
वुनि आँस स्व नेरनुच सखरुय करान जि नेबर्य गव आलव,
"राजु बाँय, ह्यसु रोज़।" स्वनु बटनि दिच दारि किन्य
नज़र। अख फँकीर ओस ज़्यूठ सफेद फ्यरन लॉगिथ।
कलस ओसुस बोड सब्ज दस्तार तु हॉटिस कृहुन गुलोबंद।
स्वनु बटन्य वुछिथुय ह्योत फँकीरन बेयि वनुन, "दुश्मन हय
छुय ज़ागान। कांह छुय नु अथु शेहलावन वोल। कुतिस

वातख तु कोत गछख? स्वरुफ हय छुय ब्रोंह कनि ऑर
 कॅरिथ।" स्वनु बटनि प्यव ह्यस। तस ओस ब्रोंठुय
 दुरकाकनि हुंद शख। यनु अँम्यसुंदिस रुनिस तरकी गॉयि,
 तनु वोत तसुंजि दुरकाकनि म्यंगन नार दज़ान। अकि द्वयि
 लटि वॉत्य हालात लायि लाय करुनस प्यठ ति। स्वनु बटनि
 हुंज़ हालत वुछिथ ज़ोन फँकीरन जि बटन्य गॉयि ग्वतन तु
 न्वसकु गव कारगर। दारि तल यिथ वोनूनस, "जॉद्य फुटुज
 हय छनय तैयार थँवमुच्च, मगर च़े नय पोशी नु केंह। च़े हय
 छुय ख्वदा सॉब मदुतस।" स्वनु बटनि पृछुस सरु करनु
 बापथ, "पीर सॉब, यि कुस छुम दुश्मन? नाव वनतम।"
 मगर फँकीरन वोन नु खूलिथ केंह, "च़ु मय बर तमिच
 फिकिर। मे छुय हेरिम होकुम। बु छुसय च़े रॉछ कॅरिथ।"
 स्वनु बटनि हुंद येकीन गव व्वन्य प्वख्तु। सूंचुन फँकीर छु
 ख्वदा दोस्त। अँमिस पज़ि नु कूर्य कूर्य कडुन। यि अँमिस

वनुन ओस, ति वोनून। अमि खोतु क्या वनि? दोपुनस, "बु हज़ छसय हवालु। मे नु हज़ छुय नु च़े वरॉय कांह अथु रोट करन वोल।" फँकीरन वोनूस, "च़ु रोज़ी बिला वसवास। च़े नय पोरी नु कांह। कडी नोठ, दस्तगीर साँबस हय छु नियाज़ खारुन।" स्वनु बटन्य गॉयि रूज़िथ तस ओस अकोय दँह्युन, युस तमि माल्युन गछ़नु खॉतरु थोवमुत ओस। दोपुनस, "बब, नोठ नु हज़ छुम नु अज़ कांह। आँठ आनु छिम। अगर हज़ वनख तु।" फँकीरन च़ॅट तसुंज़ कथ, "नोठ छुय ना गंड कॅरिथ। अनी जल, बु नय यिमय नु पतु। मे हय छुय दस्तगीर साँबुन आलव।" स्वनु बटनि गव सरु ज़ि फँकीर छु पायि बोड तु सोरुय ज़ानन वोल। यि सूंचिथ ज़ि दुश्मन छु गालुन, कोड तमि दँह वपुयुन तु द्युतुन बबस। बब द्राव क्रख दिवान, "गछ़ी करी आँश। साँरी दुश्मन हय वुडॉविमय। च़े नय पोशी नु व्वन्य कांह।" स्वनु

बटन्य गॉयि दिल मलूल। सूंचुन, "अज़ कुत्य कौल्य आयोव
मे मोकु माल्युन गछुनस मगर क्वदुरतस ऑस नु मरज़ी।
चलो, यि ति गव ठीखुय। अगर नु अज़ यि फँकीर यीहे,
दुश्मन थवुहँन मे पुचु पार कॅरिथ। मे छु क्वदरथ मदुतस, मे
क्या करन?" यि सूंचिथुय आयि तस बुथिस रोनक।

दोयिमि द्वहय पैयि स्वनु बटन्य असमानु। सु फँकीर
ओस तसुंज़ि दुरकाकनि तु अँमीना जी हुंद गरु ति गोमुत।
तिमन ति ऑस तँम्य ऑन तु गॉन यँहय कथ वँनिमुचु तु
नोठ हेत्यमुत्य। मगर युतुय योत गव नु कँह। दपान स्वनु
बटनि हुंज़ मॉज ऑस कालु शामस ताम दरवाज़स कुन
मुदय गंडिथ वुछान तु कोरि प्रारान। च़ीर्य राथक्युत द्युत
तमि अमानथ। यि शैछ बूज़िथ गॉयि स्वनु बटन्य देवानु तु
ह्योतुन वछ च़ेटुन। मगर तमि सुत्य क्या अंदिहे? सॉद मकार
ओस गोमुत पनुन कार कॅरिथ।

"मगर जान साँब छुनु तिमव मंजु। सु छु पँज्य पॉठ्य मलंग। यस पनुन अथु प्यठ थोवुन, सु वोथ थोद। पोज़ हय बोज़ख तु अँस्य छी तसुंदी किन्य दूह दूह कडान। म्यॉनिस खानुदारस ति छै तस प्यठ बडु पछ", हँनीफा जी वोन स्वनु बटनि। "न न, मे रूज़ नु व्वन्य काँसि प्यठ पछ", वोनुस स्वनु बटनि वापस। शीला जी आँस वुनिस ताम छवपु कँरिथ। तस रूद नु पानस तान्य तु वोनुनस, "मगर त्रे क्या हरजु छुय? सु मा छु बिचोर पाँसु रटान। अख गाडु सेर छु अनुन। च़ु सोँच पानय जि बाँय साँबस कूताह तकलीफ छु?" अख र्यथ ओस गोमुत अर्जन दीवस नोव साहाब आमृतिस तु तँमी ओस सु तालि किन्य ओनमुत। पँत्यमिस ब्रूँठिमिस ओसुस हिसाब मंगान तु कथि कथि प्यठ ओसुस ससप्यंड करनुच दमकी दिवान। गर्युक सुकून ओस ग्वडय रोवमुत। व्वन्य ह्योतुन अर्जन दीवस सेहतस प्यठ ति असर

प्योन। स्वनु बटन्य नरमेयि। सूंचुन, हर्जु ति छुनु कांह। आव
तु डोन्युव, गव तु गासुव। बलायि छुनुस, गाडु सेरस अँकिस
छु वदुन।

महद साँबनि ज़ारु पारु सुत्य गव जान साँब स्वनु बटनि
हुंद गरु यिनस आमादु। महद साँब आस पानु सुत्य तु
पनुनिस मोहनिविस अथि अनुनाँवन जेजीर ति। बतु ख्यनु
पतु येलि अर्जन दीव जेजीरि त्योंगुल लोग करनि, जान
साँबन वोनुस, "थव साँ, गोस त्योंगुल। कर व्वन्य आराम।
माँलिक छु रुत करन वोल।" स्वनु बटनि हेचोव क्याहतान्य
वनुन जि महद साँबन वोनुस कनस तल, "मलंगस छे
साँरुय आसान खबर। तस छेनु व्यछुनाँविथ वननुच
ज़रूरथ।" तमोक च्यथुय द्रायि जान साँब तु महद साँब
वापस। अर्जन दीव तु स्वनु बटन्य रूद्य यूत कँरिथ ति राँत्य
रातस परेशान।

चोरि दोह्य पतय गॅयि अर्जन दीवनिस साहबस वापस तबदीली। दपान हेरि प्यठय ओस आर्डर वोतमुत तु द्वन द्वहन अंदर ओस तस प्रानि जायि प्यठ वापस यिनु खॉतरु होकुम दिनु आमुत। युथुय यि कथ ननेयि, गामुक गाम आव स्वनु बटनि मुबारुकस। मगर स्वनु बटन्य ऑस नु गरि केंह। स्व ऑस महद साँबुनि गरि तस गुल्य गंडिथ माँफी मंगान जि बु क्याह ऑसुस जान साँबस मुतलिक सोंचान? जान साँबस पैयिहे स्व परन, मगर सु ओस कालय तति द्रामुत।

अमि पतु सपुद बेयि अख वाकुह। अकि द्वह ऑस स्वनु बटन्य गरि बिहिथ तोमुल चारान। हंगु तु मंगु प्यव जान साँब वाँतिथ तु मँजिन चाय। स्वनु बटनि आयि नु पछ। अज ताम ऑस स्व प्रथ सातु तस महद साँबुन गॅछिथ समखान तु सलाम करान। अज आव सु पानय गरु। जान साँबस पतु कनि तँकियु थँविथ तु जंगन प्यठ चादर त्रॉविथ

गँयि स्व चाय बनावुनि। येलि चाय ह्यथ वापस आयि, जान सॉब ओस थोद वँथिथ ज़न तँस्य प्रारान। जान सॉबन कोर चाय च्यनस इनकार। स्वनु बटनि पेंयि नज़र, तस ओस अथस मंज़ सु खिलोनु मोटर, युस अज़न दीवन राथुय बिलू जीनि खॉतरु शहरु प्यठु ओस ओनमुत। स्वनु बटनि हुंदि पृछनु ब्रोंठुय वोनुस जान सॉबन, "यि बलायि कॅमी अँन्य योर? बु छुनय यि ग्वडु दफाह कॅरिथ।" यि वँनिथुय द्राव जान सॉब वापस। स्वनु बटन्य व्वशलेयि। "कुमती मोटर ओस। खबर अँमिस क्याह रोव?" तस रूद दँय दूहस मोटरुक फेरान।

बेयि दूह येलि हँनीफा जी स्वनु बटनि निश आयि, तस आसु अँछ व्वज़जि। बासान ओस ज़न तु रॉत्य रातस आँस हुशारुय रूज़मुच़। स्वनु बटनि पृछुनस, "केहे दँलील? चु क्या छख परेशान ज़न? खॉरुय छा?" हँनीफा जी वोनुस,

"हतय अँस्य अँस्य ना रातस अँमीनुनि गरि। तस ओस बशु सख ब्यमार। दपान अँस राथ आव सु अख खिलोनु मोटर ह्यथ तु लोग तथ गिंदुनि। वुछान वुछान खोतुस तफ तु गँयस लारुनि। अज़ सुबहॉय छुन तिमव सु मोटर दॉरिथ। दपान वुन्यक्यस छुस आरामुय। अँस्य कति शोंग्य रातस?"

यि बूज़िथुय गँयि स्वनु बटनि दुनन। सूंचुन, "हय हे, यि आसिहे सुय मोटर। खबर यिमन मा लँज पताह ज़ि सु ओस सोन।" पृछुनस, "बशन कति ओस सु ओनमुत?" हँनीफा जी वोनस, "खबर हय, दपान कति ताम ओसुन छवटु प्यठु तुलमुत।" स्वनु बटनि खँच वॉलिज बोठ तु लँज जान सॉबस मनु मँज़ी बलायि लगनि। "अगर नु सु यि बलायि गरु मंज़ु कँडिथ छुनिहे, खबर क्याह गुदरिहे कोठन।" अमि कुसु पतु गँयि तस ज़्यादय पहन जान सॉबुन्य थफ। जान सॉब येलि ति अथ गामस मंज़ु यीहे, स्व अँस तस निश

वाँतिथ तसुंघ ख्वर छलान। यि रीथ रूज़ तीतिस कालस
जाँरी, यीतिस कालस जान साँब ओर यिवान रूद।



अख वॅरी गव जान साँबस गाम यिनुसुय। तसुंद लोग
नु कांह पय पताह। गामु वाँल्य आँस्य सख परेशान जि
तिहुंघन दाघन कुस करि व्वन्य यलाज। अकि द्वह लॅज
पताह जि कॅम्यताम ओस सु पंदाह मील दूर बेयिस आँकिस
गामस मंज़ वुछमुत। महद साँबन तुल्य त्रे चोर नफर बेयि
सुत्य तु द्राव तस छंडुनि। पताह लॅज जि अथ गामस मंज़
छुनु कुहन्य जान साँब रोज़ान। महद साँबन येलि गामु
वालयन जान साँबुन्य शक्ल सूरथ वॅन्य, तिम गॅयि हाँरान।
अमि शक्लि हुंद ओस अख नफर गामस मंज़ तु तस ओस

नाव नबु। मगर नबस आँस्य गाँमुत्य लगबग जु वॅरी गाम
त्राँव्यमुतिस। महद साँबन येलि नबुन्य दॅलील बूज़, सु प्यव
असमानु।

दपान नबस ओस ल्वकुचारय मोल गुज़र्योमुत। माँज
आँसुस ज़्यादु तर ब्यमारुय रोज़ान। नबस ओस नु बेनि बोय
कांह। पांछ शै कनाल जॅमीन आँसिख यथ प्यठ तिम गुज़ारु
आँस्य करान। दपान नबुन्य जॅमीन आँस यूसुफ साँबुनिस
जॅमीनस सै-मंज़स। यूसुफ साँब ओस नबुन ज़्युठ पैतुर तु
सु ओस बोय मरनु पतु कुनि तॅरीकु नबुन्य जॅमीन यछान
खेन्य। नबु रूद वारियाहस कालस सीनु दिथ, मगर येलि
यूसुफ साँबन अकि द्वह तस पनुन्यन मोहनिव्यन अथि मार
दिवुनोव, तस राँव ह्यमथ। गामु वाँल्य रूद्य सिरिफ तमाशु
वुछान, तिक्क्याज़ि यूसुफ साँबस आँस्य तिम ति खोचान।
अमि पतु गाँयि नबस गामु वाल्यन हुंज़ नफरत। अँथ्य

आसुनाहस मंज गॅयि नबस मॉज मॅरिथ तु अकि द्दह
राथक्युत च़ोल नबु गामु मंजु। अमि पतु आव सु गाम कुल
द्वयि लटि मगर कॉसि सुत्य कॅरन नु कांह कथ। बस गामस
अँघ अँघ द्युतुन चकर तु द्राव वापस। महद सॉबस निशि
यि बूज़िथ जि नबु ओस मलंग, त्रोव गामु वाल्यव असुन।
"मलंग आसिहे तु तेलि कति खेयिहे मार?"



स्वनु बटनि रूद ओश वसान। अज़ ऑस स्व मुसीबतस
मंज ह्यनु आमुच़। अज़न दीव ओस ब्यमार तु यलाजु बापथ
ओसुख सु शहरुकिस बॅडिस हस्पतालस मंज दॉखुल
कोरमुत। अज़ ऑस्य गॉमुत्य तस पंदाह द्दह यलाज चलान
मगर सु ओस द्दह पतु द्दह पथुय गछ़ान। डाक्टरव ओस

स्वनु बटनि मशवरु द्युतमुत जि ब्यमार नीवुन दिलि, मगर तस आँस नु त्यूत खर्च तुलनुच सूरथ। पनुन्य किन्य फीर स्व सारिनय आँशुनावन मगर खास अथुरोट सपदुस नु केंह। बिलूजी ओसुन त्रोवमुत हमसायि गरि तु पानु आँस हस्पतालस मंज रुनिस निश बिहिथ। हबु कँदलु आँसुस ल्वकुट ज़ाम रोज़ान तु स्वय आँसुस बतु अनान। मगर ख्यनु क्या ओसुस यिवान? अर्जन दीवस आँसुस गॉमुत्य चोर दूह केंह ख्यनुसय।

स्वनु बटनि पेयि वानु पेंजि प्यठुय नेंदुर। अज आँस स्व राँत्य रातस हुशारुय। रुनिस आँसुस नु हालत ठीख। डाक्टरव वोनुहोख ब्यमार छु ज़्यादु खोतु ज़्यादु पांचन आँठन दूहन हुंद मेहमान। ज़ॉमियन वोनुनस, "मे छु बासान च़ु वस गरु। अख यिख तति नज़र दिथ, बेयि खारुहँन बिलूजी यूर्य। खबर छा, क्याह आसि सपदन वोला। तोति

वुछि मॉलिस बुथ।" फुट्यमुत्यव क्वठ्यव ऑस स्वनु बटन्य
हस्पतालु मंज़ु द्रामुच तु वदान वदान बटु माल्युन अडस
प्यठ वॉचमुच।

गाडि हुंदि हारनु सुत्य गॉयि स्वनु बटन्य हुशार। अँकिस
पृछुन वख्त। नव आसु बजेमचु। गाडि हुंज़ टिकठ कडनु
खॉतरु युथुय तमि टिकटि वॉलिस पॉसु दित्य, तस पेयि
अँकिस चायि वानस कुन नज़र। अख नफर ओस पँथुरिस
प्यठ बिहिथ तमोक च्यवान। तमि दिच अँछन मूरन। आ,
सुय ओस। तसुंद ज्यूठ मस तु न्यूल फ्यरन ओस साफ
यिवान बोज़नु। स्वनु बटनि त्रॉव टिकठ अँती। पागुलन हुंघ
पॉठ्य तुजिन दव तु वॉच चायि वानस निश। जान सॉब
ओस तमोक च्यनस सुत्य मस्त। स्वनु बटनि थोव तसुंघन
ख्वरन प्यठ कलु तु ह्योतुन वदुन। जान सॉबन पृछुनस,
"हतु बी, वदान क्याज़ि छख?" स्वनु बटनि गॉयि वदान

वदान गित्य तु कलु ख्वरन प्यठ थँविथुय वोनूनस, "बब,
 कूत काल गोम छांडान। मे हज़ छय चॉनी आश। नारस मंज़
 छस। अज़ करतम म्वकुलन पाय, नतु मारय येती पान।"
 जान साँब गव रोबूद ह्यू। लूकन आव नु केंह समुज। अँमिस
 बटनि क्याह तकलीफ छु? बेयि त्रुह वुहरिस जवानस
 क्याज़ि छे यि बब वनान? अँक्य वोनूनस, "हतु बी, यि छुनु
 बब, यि छु ग्वलाम नँबी। अँमिस छु वुनि खांदर ति
 करुनय।" मगर स्वनु बटन्य आँस नु काँसि हुंज़ कथ
 बोज़ान। स्व आँस सिरिफ जान साँबुन्य कथ बोज़नस
 प्रारान। जान साँबन थोवुस कलस प्यठ अथु। स्वनु बटनि
 तुल कलु थोद। ओश ओसुस दिग्यनि वसान। जान साँबन
 वोनूनस, "बु छुस अख मोज़ूर। मे क्याज़ि छख ख्वरन अथु
 लॉगिथ ग्वनाहगार बनावान। तकलीफ क्या छुय?" स्वनु
 बटनि वोनूस, "रून हज़ छुम ब्यमार। बचनुच छस नु कांह

व्वनेद। चॉनी सथ छम।" जान सॉबन द्युतुस कलस फश तु वोनूनस, "फिकिर मु बर। गछ कोत छुय गछुन। मॉलिक छु रुत करन वोल।" अमि पतु द्राव सु बाक्यन मोजूरन सुत्य पनुनिस कारस। स्वनु बटन्य रूजुस वुछान। जान सॉबस ओस अज ति ग्वडव ह्योर येजार तु ख्वर ऑसिस ननुवॉरी।

स्वनु बटनि लॅग्य जु द्वह गाम गॅछिथ वापस यिनस। नेचुव ओनुन सुत्य। हस्पताल वॉच तु रुनिस अॅद्य पॅख्य वुछिन लूख जमाह। जंगन चायस थरु थरु। "त्रठ छम पेमुच। पॅत्यमी गरि मा रूजुस बु न्यबर!" नॅजदीख पहन वॉच तु कॅम्यतान्य दिच क्रख "अॅक्या आयि।" लूकव त्राँव जाय तु स्वनु बटनि वुछ नोवुय आलम। अर्जन दीव ओस डोख दिथ डाक्टर सॉबस सुत्य कथ करान। कॉसि ओस नु समुज यिवान जि अचानक किथु पॉठ्य गॉयि ब्यमारस फर्ख। अर्जन दीवस ओस अथस मंज द्वदु गिलासु तु सु

ओस दामु दामु द्वद च्यवान। स्वनु बटनि वुछिथुय आव तस
बुथिस रंग तु कॅरुन तस अथस थफ। तमि वोनूनस कनस
तल, "मे लोब राथ जान सॉब।"

बेयि द्वह गॉयि स्वनु बटन्य तु तसुंद जॉमी अडस प्यठ
जान सॉबस समखुनि। चायि वानस प्यठ वॉत्य तु पृछुख
चायि वॉलिस, "हे बाया, जान सब कति छु?" चायि
वॉलिस तोर नु कॅह फिकरी। तॅम्य वोनूनख, "कुस जान
सॉब?" स्वनु बटनि वोनूस, "युस हसॉ मे ऊतरु सुब्रहस
येति समख्यव। यस तोह्य ग्वलाम नॅबी छिवु वनान।" चायि
वॉल्य वोनूनस, "सु द्राव राथ शामसुय वापस। दपान ओस
मे छु बडु दूर वातुन।" स्वनु बटनि पृछुस, "योर कर ओस
आमुत?" चायि वॉल्य वोनूस, "ओतुरय ओस आमुत। राथ
ओसुस दौयुम द्वह।"



अर्जन दीवस दिचुख अकि हफ्तु पतय हस्पतालु मंजु
छुटी। सु ओस व्वन्य बिलकुल ठीख गोमुत। दपान बँड्य
डाक्टर साँबन वोन जि तस ओस यलाज गलथ गोमुत।
गामुकिस टांगु अडस प्यठ ओस अर्जन दीवस समखुनि
गामुक गाम आमुत। येलि सु टांगु प्यठ व्वन वोथ, महद
साँबन रोट सु नालुमति। साँरी आँस्य ख्वश। अख ओस
अर्जन दीव वारु कारु गरु आमुत, बेयि यि जि स्वनु बटनि
ओस जान साँब पानु वुछमुत।

केंह काल गँछिथ वोन अकि दूह महद साँबन स्वनु
बटनि, "चे क्या छुय बासान, जान साँब यियि ना व्वन्य योर
जांह?" स्वनु बटनि दिचु रुनिस कुन अख नजर। ज्यूठ व्वश
त्राँविथ वोनून महद साँबस कुन, "यियि क्याजि नु? यियि
जरूर, येलि पजि मनु कांह याद कर्यस।"